



# Editorial

## Hun leh kumte a bei zing

Hun leh kumte hung kihei in tu hin kumtawp I tung to kit tau a, tu kum I hun mat dan teu nung thil kit leu hin Pathian dawigual I hun uh I matnau a tam zaw em ahiloleh Pathian dawilo gual ah I hun matnau a tam zaw em kingaitua hi tiu. Hun hi tui gual in a liam a, I khawvel damlai niteu le, ngak nei lo in a liam mang zing sun nitin in, la hun pha hi kikhel sak kin I um danteu Lalpa kengbul ah khupdin in kipuan ding I hingal un. Zia khawvel leh vangam in le I tu ga chiat I kiluak ding uh ahi. Pathian dawigual ah hun mat ah thilpha bawl chu zia khawvel leh vangam ah le malzawlina dawnna ahi. Thilpha bawl leh Pathian dawidan ah hun mang kuama a kisik a um ngai puai. Mi kisikte hi kuate ahiu em I ti chun a hun mang diklote, thil phalo bawlte ahiu. Nang in le la hun mang dik

in, a ziak chu hun leh kumte a bei zing ahi. Pastor Liankhopau chun, 'Aw Lalpa zia (mizia) kimna ding in hun tin, ken le mat thiam ka nuam, ka damlai hun chawmchate hi; Lalpa a'n pe tang ka" ti in la in a phuak ahi. Unau nang in la hun kua a ding in la mang sek em? La hun kua la pe tam pen sek em ahiloleh la hun bang bawlina in la mang tam pen em? La hun tam zaw la piak chu Pathian ahi em, Phone ahi em, TV ahi em, sum leh pai hawlina ahi em? Pathian a ding ah hun la mat tawh thil dang ding ah la hun mat khawi zawk a tam zaw diam? Nungak/Tangval I ngai a, amau a ding a chun i hun mat I sumsial pua, amau tawh hun mat khawm nuam I sa, ama tawh hun a tam thei pen ah mat I nuam sek ahi. Aleh nang in nang hun ngaitu, nang a ding ah bangkim huam ah a hinna le petu,

la thasang a thwak a, la thisik  
ah thipa chu tawh la hun mang  
khawm nuam lo la hi em? Malza-  
wlna chitin a piak thei tin cheng  
nang a hun pia, damna, bu leh  
bal, sil leh chen, nek leh chak a  
hun piak zosia gensen ding gual  
ei puai, Lalpa'n ei hepina hi, Van  
lalchutpha hun taisan in, nang

ding gelnan gan an piakna a hun  
tel.

Unau dan leh ti kin thinan a hun  
dawn zing a, la hunpha hi kikhel  
khan a, a ziak chu hun leh kumte  
hin ngak neilo in a liam zing ahi,  
Amen.

--o0o--

# Pathian in a thu awi ding in ei daw i hi.

**Matt. 7:24-27; Joh. 15:14**

**By: Rev. Seilunlal Vaiphei**

Mihing khat chun lawi leh gual kinei chiat ding ahi. A hileh i lawi leh gualteu chu eimau kiang ah bang gual in um ding in i daw i uh em? I pawimaw na zosia ei panpi ding leh ei thasang thei ding bep in ahem? I pawimaw na mun ah ei ngaisaklo te leh i thugen ei nial kal zing ziangte chu atawp leh lawi ding inle kidawi talo ding hilo ahem? Eimau inle lawi pha ding i daw i gual in Lal Jesu ngei inle athu ngai ding leh a lawi ding adawi dan anuai ahin ala en hitiu.

**Jesu lawi pha hi nuam chun a thu a awi ding a hi:** Khawvel ah Lal Jesu alenlai ah khan alawi ding in mi 12 te ala siam a. Lal Jesu'n chanchinpha agen phat tak leh a nungzuite leh ngaitha tute kuama a thugen lai in navek um in a um ngai puau hi. Biakin ate, in mun ate, lawng chung ate leh mun dang dang ate thu agen phat tak leh a thugen ngai nuam, zui nuam ah alawi hi nuam zosi-ate'n ama ahun zuan sek ui. Zia lo a chunle a melma pakhat lekha thiam, Juda dan thiam thak khat chanchinpha ki tangko pi zosia suk mangthai guatu Paul ngei le a lawi ding in ala siam kit hi.

Pathian thu ki genna ta phawt in mipi achia khawm seku'n, phun chiak umlo in gun takin a ngaitha sek ui. Himaleh, a thu ngaithak

mai chu Jesu lawi pha hina ating tak tak theilo ahi. Lawi pha hi tak takna ding ah chun a thu awi an-gai hi. Etsaknan, i lawiteu khat in i kiang in thil hun dawn takenla, athugen chu ngaitha'n pia diaklo leu hin a dawntu a ding ah chun um zia nei diak lo ding ahi. A thugen ngai tha'n a gen gual ah i bawl piaklo chun lawi leh gual ding in ei daw i ta him him lo ding ahi.

**Jesu thu awi chu suangpi chung ah In kisa gual ahi:** Jesu thugen ngaitha ah a thu awiteu chu alaw-ite ahiu hi. Zia gual mite chu su-angpi chung ah inn kisa gual ahiu in, athu awi lote chu vang piaunel chung ah inn sa tu gual ahiu. kua hem khat chun luipam ah In sa ta-hena, a In sak chu suangpi chung ahi chun tui hung lian ta lehle sia

diak puan tin, himaleh suangpi chung hi lo ah, piaunel chung ah in a sak khak chun, tui a hung let phat leh bailam takin tawk mang mai ding ahi.

Kua hitaleh Jesu thugen taksangte chun kumtuang hinna, hinna det tak chu anei sek un, A thu mang lote chun vang kumtuang hinna det tak anei thei puau hi. Lal Jesu thu a awilo ziakun a gilo sek ua, Pathian thu hingte angaitha pei ngai puau hi. Zia gual mite chun puitute, nu leh pa, asang ah upa zawte thu manglo in guchak, kisual, mi sukbuai tite a ching sek ui. Zia gual mite chu Jesu'n le lawi ding in a daw lo ahi.

**Thukhakna:** I Bible sim nau apat i mu gual un, Jesu thugen ngaitha tute ki etdik theina dingin In sak tekhn thun agen a. Lal Jesu thugen hia ah zawm tute hinkhua det dan leh a suklin zaw ahilo dan hiat daw thei ahi. I gen tak gual un, Jesu thugen ngaithak mai mai hin lawi pha'n ei siam pua, a thu awi hi ama lawipha hina zawk chu ahi. Jesu ngei in ala gen Johan 15: 14 na achun ***“Thu ka hun piak zosia hi la hiu a hi chun ka lawite hi'n lau”*** ati ahi.

--o0o--

---

# THAWKITNA MASA LEH THAWKITNA NUNUNG/VAIHAWMNA NUNUNG ~T.Upa Singzalian S. Kawtlian P.C

Amasa'n simtute, I Lalpa'u Jesu min thiango in chibai ka hun buk hi.

(i) **THAWKITNA MASA-** Matt.24:29-31; Mark 13:24-27; Luk. 21:25-28; 1Thess.4:15-17.

(ii) **THAWKITNA NUNUNG-** Matt. 25:31-46; Daniel 12:1-3; Thup. 20:11-15.

## (i) Thawkitna masa:

Bible changtel: "Thawkitna masa pangte chu a thiango un, a vang uh a phai, amau chung ah chun thinina(Meidil) chun thu anei ta puai" (Thup.20:6).

Simtu dawitak, I thupi ua ilut ma'u in genlat masak lo theilo, hiat masak ngai a uma, zia chu i Lalpa'u Jesu khrista hin kumtuang ah hinna, lei leh van ah thuneina zosia leh vaihawmna zosia te hi, a pa Pathian in khawvel ah ahung ah tatna asepa ah thiamchanga van ah akal to akhan akhut ah a piak ahi tai ti Matthai 28:18na a khan chiantak mai in imu'u ah, hiat le i he tau hilo maw..! A chuti leh bangti dan ah thawkitna nunung chung-

hang ah lunggim leh luangmuang theilo zing nalai ihu leh maw..! kumtuang hinna lekhabu(original) Lal Jesu khrista hi diktak in la lungsung/la lungchang pumpi'n khek(reserve) neilo in la lal ngei leh hukdampa ngei dingin lalut in pawm in nei leh chin, i Bible changtel nau ah thawkitna masa(rapture) mi thiango laklawkna pangta, zia thawkitna chini ah thuneitu Lalpa Jesu neitu, i Bible in mi piangthak atite vang lung awpkaina leh kimuanmawna thu himhim ama ah chun umtalo himhim ahi aw, Halelluiah..!!

Aziak chu i thubul ua igen taksa'u Lalpa Jesu hi ama bep hin thuneina zosia vaihawmna zosia leh Lalchutpha pa Pathian in akhut ah akawi ahi tak ziak in

thawkitna nunung ah chunle thiamlo chang himhim lo ding ihu ti Lal Jesu a chun a kichian ta lua hilo ahem?.

Zia ban ah chun, Thawkitna masa, i Bible in ati pen hi Matthai 24:29-31; Marka 13:24-27; Luk.21:25-28; 1Thess.4:15-17 zia changte ahin i mu'u a, zia chu(Rapture) mithiangtho laklawk ti ah i bible in ei gen, I Lalpa Jesu le chanchinpha te ah ala gen kiging zing in um un, bangtik leh la Lalpa'u hung ding ahem ti la he puau, ala ti zing kha zia mi thiangtho laklawk na ding hi ahi ti hiatchian akul takzet ta ahi.

Ziaziakchun, Unau dawitak, tulai hun hi i et leh mihing leh mihing kikal ah Covid-19 ziak ah kimuanmawtuana aum zing bep hilo in, ani-ani ah Covid-19 ziak ah mithi pung huthut ziangte ahin nangma leh keima insung ah malzin ah inei masang ngei in, thina'n azaw himhim lo, thina, kumtuang damna chansaktu Lalpa Jesu hi lal ah leh hukdampa ah nei ah, ama hi la gitlona zosia, la kituplona zosia leh la diklona zosia te silthiang dingin thu mama hinle banzâk in la lunggil ei pian la, ka thisan in silthian piak ingka ti in, hepina tawpk-

hawk in ahun chial zing hi. A chialna aw chun ka cha la lunggil ei pian ati aw hih dawnhu ngei dingin ala kisa'n aw Unau..

Chuleh, I Lalpa'u Jesu'n Johan 14:3 ah "Ka chia ah nangma'u a ding ah mun ka bawltup zaw tak leh, hungkit ing ka tin, ka umna nangma'u le la um theina ding un, keima ngei in hung pui kit ding ka hi" ti in ei gen ahi. Halelluijah...!!

Thupuan 7:9, 14-17 sung ah thawkitna masa(rapture) ah lakto ah umte dinmun diktak ei genchian dan chu zia gual ahin agen hi, Puanvam sil(lunggil thi-angtho khrista thisan ah sawpvamte) a khut ua(zawna) tûmbâk chawi ah Belamno leh lalchutpha ma ah dingte, Pathian lalchutpha ma ah um in sun leh zan ah nasem in a um tau, tichun lalchutpha ah kichu chu alak un um zing tan tin, gilkiat kit ta puan tin uh, a danguh le chakkit ta puan a, Lalchutpha ah um Belamno chun vak in tin, hinna tuinak ah chun pui intin, amit ua pat mitthi zosia Pathian in thek hul piak tan a, Halelluijah, Amen!!

**(ii) Thawkitna nunung:**

"Kuale hinna lekhabu

ah amin kiziklo taphawt chu thi nina meidil ah chun apai tau” (Thup.20:15)

Thawkitna nunung hih thupuan ah chun Mithite vaihawm piakna aki tia, chuleh Matthai ziak ah chun ‘Namtin chung ah vaihawmna’ ti in imu’u hi. Abang chu hi ziang leh le thutanna tawp pen(mihingte a dinga) leh kumtuang ah ding ah vaihawm piakna tawpna pen ahi ti i lunggil ua kawitup masa’i tiu ti hi i thupi’u ah ilut ma’u ah i dawu masak pen ding uh hi henla.

Amasa’n, Matthai 25:31-46 kikal thu hi i et vengveng ahi chun Kelchate lak ah Belamte a khendan sek gual in hun khendan ina, ati masa, zia zaw ah chun Belamte chu a changlam ah kawu intin, Kelchate vang chu a veilam ah kawu ina. Zia tak ah agen a changlam ah umte, Belamte hi khrista Jesu Belampu neitute, mi piangthak ahiu. Chuleh a panina a veilam ah umte, Kelchate hi ahiu leh khrista Jesu(hukdampa) Belampu neilote ahiu ti, a nuailam ah a changtawp na lam khan chiantak in agenlang ta ahi.

Zia ban ah chun, thupuan apat in anina dingin vak en

veng veng kit hitiu- Zia tak ahin a chung ah imu tak sau dungzui in Kelchate lak ah pat Belamte a khendan gual ma in, Hinna lekhabu ah min kizik te leh kiziklote hawldawk sipsip ah khendanna vangam ah lut ding leh gawtmun meidil ah lut ding te khen danna mama tho ahi ti imu thei ui.

Ziaziakchun, i thubul lam ah igen tak gual un Johan 14:6na ah “Lalpa Jesu’n, kei lampi leh thutak leh hinna ka hi. Keima chialo chu kuama Pa kiang atung ngei puau hi” titu Lalpa Jesu hih nei chiat leu hin Kelchate leh Belamte khendan tu ding ama ahia, Hinna lekhabu ah Angel ten i min uh a ziklut/akhumlut ziang thei nau le Lalpa Jesu ah um ahi ti hi avel vel ah iki hiatsak nawppen uh chu ahi.

I thu khakna ding un simtu unau dawitakte la kumtuang mun ding la gel phat leh thamuang taktak theilo la hi khakpal chun, zia “La” thumal te hi ala sut vengveng in aw...-Thina’n ngamla anei diak pua’n, natna’n le lau anei diak puai. Gawtmun inle kuama valzawlo anei puai; Hukdamna thu la ngailo chun la chan ding chu ka ngaingam puai.

Muang ta puai tiu, ka

lengualte, thina'n a ngak zing hi, ti tawh ka ngawngkawh a nuam in a puak le ajang a, la thagau a dingin chawldamna hun piangka, titu Lalpa Jesu kiang ah a kinlam pen ah kipiaklut ahun takzet tai ti in ka hun chial nawn nawn ahi aw.

Pa Pathian in a thu mawh tak leh basamtak kawm ah i taklat kham kham teu a lopina suklatna dingin simtute chung in malzawlina'n vuk ta hen, Amen..

--o0o--

## **Gingtute hi Abraham gual ah midang malzawltu dingte ihu.**

~Rev. Thanglianmang.

**1. Abraham chu midang malzawltu ahi:** Abraham chu Pathian in kanaan gam zuan ding ah a ko daw lai ah chun "Nangma chu malzawltu hin la" ala ti ahi(-Gen.12:2). Pathian gen gual ngei ah chun Abraham chu a suapi Lot leh midangte a dingin malzawltu ahung hita ahi. (Abraham in a suapi Lot chu Sodom leh Gomorah siatna apat a hukdawh in, chuleh Abraham chu Israel nam a ding ah suantu bul ahi ziakin malzawltu lopitak ahi).

**2. Gingtute midang malzawltu hina dingte:**

**(a) Sum leh Pai leh thildang ah midangte panpina-** Khawvel ahin mi khawsa thei deu leh migentheite hi Pathian in kipanpitua ding ah a siam ahi. Mi hausate ten le ana sem ding un mi genthei te a pawimaw ua, migentheite ten le nek leh chak amuna ding un mi hausate a pawimaw kit ui. Mi hausate hile akhang-akhang ah ahauden diak puau in, mi genthei te le kumkhua'n a genthei den diak puau. Ziakiachun, Pathian



in khawsa thei deu ah a kawî kha kipak inla, midang panpi ding la nei te kha panpi in. Midang panpina dingte chu- i suapite panpina, damlona leh vangsia tuakte panpina, nauchagate panpina, gentheite panpina leh adang dang ahi. Midangte haksat hun ah la panpi chun nang haksat hun ah midangte ahung panpi ding Pathian in hun pe ding ahi. Ei dit kit zolo dingte panpi chu van ah go khawlkhawmna ahi kit ahi.

**(b) *Tha leh zung ah panpina-*** Midangte panpi nawpna lungthim nei taphawt te chun tha leh zung in midangte chu panpi thei chiat ahi. A diak ah khanglai lam deute chun amau sang ah zawngkhal zawte panpi thei na chu ahau mama'u ahi. Etsakna dingin, Mi van puak zawlo ahem, vangik adawp zawlo leh nasep azawlo imu ah, panpi ngaite chu kipadam lo ah i panpi ding ahi.

**(c) *Paukam leh hindan ah panpina-*** Midang in gentheina atuak nikhua'u ah va thamuan chu gingtute bawl ding ahi. A diak ah kochuam puituten pauchapna va nei piak chu amau panpina hawi pen ahi. Zia lo ah chun, mikhat in thilkhat abawl ding dan ahethlo, nang in la het ah, la va hil chu

panpina nasep khat ahi kit hi. Ziate zosia khel ah chun ginglo khat kiangah chanchinpha la gen ah pianthakna ahun nei ahem, gingtu nungtawlte la kaidin kitte chu midang malzawltu pawimaw tak ah la panna ahi. Gingtute chu khawi mun ah le i paukam leh i hindan ua midang malzawltu ihi di'u ahi. Zawnei Jonah gual ah khan i um lo di'u ahi. Jonah kha vang Lawng ah a chuan ah khan midangte sulung zingtu in apang hi. Abraham gual ah khan gingtute chu midang te malzawltu hi ding ah Lalpa'n ei dawi ahi.

--o0o--

# DANGKA SUM LEH PAI NGÂINA

Thugentu 5:10-20; 1Tim 6:3-10; Heb 13:5

By: Rev. Seilunlal Vaiphei

I Bible chang sim uh khan “Dangka sum ngainat hi gitlona chitin bul..” a tia, sum leh pai lau umna a gen chian ma mai. Marka 10:23na Mi hausa i mu gual ua khan, hausakna hin thagaulam haksatna a tut ah, Pathian tawh i kizawpmatna le a suzawngkhal thei hi. Mi masaten sual bawlna ala mat ziak un Thuthunglui zawlneite’n le a dem uh ahi(Isai 5:8; Jer 22:13).

## # Sum leh Paisa i thil nei teu:

I Sum leh pai nei teu hi amau ah sual ahi puau ah, a kawltute mawpuakna ahi zawi. Zia gual ma chun, Pathian thilpiak dang zosiate le thil phalo bawlna mat thei chait ahi. Numei leh pawsal kal tiangin le hausaknate hi, “Thil zosia kipakna dinga tamtak ei petu Pathian” apat ahi(1Tim 6:17). A nei bep hilo in lungthim thiangtho tak a i mat a phal ahi. Abraham te, Isak te, Jacob te, Solomon leh mi dang tamtakte Pathian in hausakna’n a vuk hi ti i hiau ah. Anania te nupan kha a sum nei ziak uh hilo in a zuau gen ziak un Peter in a dem ahi kha. Bible in paisa him him hi a dem pua, mi’n a nei ziak ah a demna le a um diak puai. Mu leh mat dan paisa ah alungthim put dan te’u vang a dem hi. Mihausa kha

a hausak ziaakin a dem pua, a sum in a lungthim a luadim ah, ama bep a kingaitua a, Pathian a ding ah bangma a neilo ziak in thiamlo chang a hi zawi(Lk 12:21).

Sum leh pai hin chu lau umna a nei ngei mai a, ei dal-tu le ahi thei hi. I Thagau lam le a suhatlo thei ma ma hi. Pathian nasepna i mat phal lo vang chun “Mi hausa a din vangam lut chu haksa tak ahi”(Mat 19:23).

A phatlona leh lau umna lam i vak gen ziak a neilo ding leh a tawm lam nei ding tina vang ahi puai. I lak khawm dan, i mat dan leh i nei dan a ilungthim putdan a puikawi a hi chun kisi-am phat ngal a pawimaw hi. Lungawina i hawl ahi chun mupuai tiu in, nei be ut in duamna phalo in ei pui ding ahi. Ziaziakchun,

hausu ma ma, thagaulam a hat ngal ti hi thil haksa tak ahi ti i hiat uh a pawimaw hi. Khrista ah hausu ngal, ei u a ding a kisugethei ngam zuitute i hi'u ti hemil puai tiu.

**# Sum ngainat tak luat ziaka enna hung pawtsek:** Sum ngainatna hi enna sual in ahung kilang sek a. Enna chun mit a suthum a, lungthim a susia, sakhuaana a sumelsia, ginna asuse sek hi. Enna zia kin kidona a suak thei ah, mi dangte tawh kizawpna a susia, kidawisakna a sutawm a, kilungsiatna a subei sek hi. Min enna lungthim a hung nei tak leh lungawina tak tak a nei ta puai, a neikhel thil dawi in amu masia del in bangkim huamin a bawl sek hi.

Thil pawimaw khat chusum ngainat zia k a mihing lungthim ah phatlon a hi ahi. Paisa tamana lam a nasep a kihawl a, a tamthei pen lak lut a kigua. Du amna'n lungthim pui in Pathian sangin paisa i lungthim un i kaw i ua. Zia chu Bible in "Mi du am chu milim ho ahi" a tina chu (Eph 5:5; Kol 3:5). Paisan Pathian mun a lua tak ahi chun, thudik a lia a, lawkna hawlin hinkhua hi a dangchak sek hi.

Hausakna chun chapon a hing a mimal kingai pawimaw nate, mite ngaisan utnate, mani masialnate, nawpsakna leh sual ah utnate a hing thei hi. Pathian pawlnate a suse sek a, midangte mamaw a mu thei sek puai. Sum leh pai hi hausu leh genthei a din a lau um gel a, hausu a din a lau um zaw a bang hi.

**# Sum leh pai ah lungthim put dan:** Sum leh pai ah i lungthim put ding dan uh hiat ah pawimaw te leh tepte ding ate chu-

- (i) Sum leh pai hi i dam pi'u a hilo dan hiat a phai. Khawvel pumpi nei ah hinna chan a lau um dan hemil puai hi ti'u.
- (ii) Chantawh ah lungawi thiam a kul in a pawimaw hi. Greek mipil Socrates chun "kua hem hausu pen?" a tia "a tawm pen nei ah lungawite" ti in a dawnhu hi. Hebrai zia ktu chun "La thil nei sun ua chun lungawi un" ati (Heb 13:5). Paul in "Kei vang banggual in um maleng lungawi zel ka ching ahi" ati kit hi (Phil 4:11). Lungawina hi neitam ah akinga puai, i thil neisun ah lungawi in a kinga zawi.
- (iii) I mamaw huntawh hiatthiam a phai. Nisin mamaw huntawh

mulo ahem, mamaw sang a tam in ahem lungthim diklo lam ei naisak sek hi. Thupil in “Gentheina ahem, neinunna ahem eipe ki’n. kei a dinga mamaw bepin ei chawm in” (Tpl 30:8) a ti kha zilthiam a pawimaw ma ma hi.

- (iv) Paisa hi i mamaw leh tak-sap hun a mat ding ahi. Paisa thunuai/suak ah lut ding vang ahi puai.

mat thei ahi. Pathian nasepna matchak pawimaw tak ahi thei hi. Thil dang zosia sang ah i ngai-pawi maw ah, ei thununtu ahile vang chu soal a eiputu leh gawtmun lam ei naisaktu a hithei hi. Tichun, paisa chu i lungthim put-dan zel in a phan a phalo thei hi.

--o0o--

**Thukhakna:** Sum ngainat ziaka a chia diklo tam tak Bible apat i mu thei a. Akan in Israel leh ama sungkuan chung a siatna a tut ah(-Jos 7:1-26). Balaam in thil soal a bawl law ah(Kis 22-24); Delilah in Samson a zuak ah, Gehazi in Naaman leh Elish a them a, a phak khawlaw hi(2 Le 5:20-27); Juda Iskariot in Jesu a zuak a; Anania leh Saphira te nupan in a thi khawlaw ui.

Achung ah i mu gual un Kochuam, khawtang leh Nam tiang i chankang theilo nau khat chu i du am takluat ziakun eima thunuai ah sum leh pai kuai talo ah, sum leh pai thunuai ah eimau i lut zaw tak ziak uh ahi pen hi. Chutichun, paisa chu eima leh midang a ding ah phachuam a

## BUNGPI THING LEH MIHING HINKHUA:

By: K. L. Muana Khaute

Malai chun Bungpi thing ahin thitha a cheng sek in, mihi-am te a sawi sak dan (Thêmtu) a hisek bep hilo in, miHING hinna hial le a subuai sek hi atiu (zia'h tuanthu leh aum dan hi a diak in Manipur gam ah i chenpi'u nam lianzaw te'n a taksang diak ui)

Tuni tiang hin le "Khong-nang houbaniko" ti in, Pathian thilpiak latna leh salam (zâna) a pesek nalai ui.

Zia Bungpi thing hi dawih leh kau, thitha zat chuam chuam chenna leh umna dan a i ngai uh (Sih,suang,kawl,thing etc) te hi, thitha te chenna dan ah i ngai te'u hi, Khristian sakhua (Khrista) tatna ziak in Pathian ti lo chu pathian dang dang leh siamkawm pathian te taksan lo di iti ti lai un, siamkawm pathian te'n ei subuai kha sek hi.

**Etsakna ding in:** Zân ahem ahiloleh gamnuai ahem ah mi, thisia hisia aum phat leh "a tha a lang hi; ka lau" itiu un, "Gau nei ahui, ei pet khatawl ina" iti na lai un, ginchat-na le I nei thim hiau huau nalai

sek un ka hiai. "Aum puai" ka tina hiziang lo in, "Amau khawvel ah a pathian te sang ua ei Hukdampa Jesu Khrist hi lianzaw ahi; Pathian thulo talua ah thildang lau inei zawk sek uh hi khawk mama ahi ti ka gen nawp chu ahi. Dawi leh kau chu khawvel in um ngei in a, ahi'nla, Khawvel siamtu leh hatchungnung Pathian khut in thil bangkim hi kawh mai leu hing, I damna ding un, Thina zo ah lopi tak ah hung thokit leh, Ama umna ium theina ding ua mun siam ah chia i Lalpa'u Jesu Khrista i ginna'u chu, "Dawi leh kau te apat bitna ahi" ti ah bel ding in a hun tawk mama in, hawmthaw aum puai. Ziaziakchun, Vânkhua leh tui ah kinepna thuing gen zing ngal ah, themtu galthuam thepna te ah buai zing ta puai tiu. A hepina thisan ah ei tatna hi, Khawvel i zawna ding uh chu ahi.

Eden natna apat taddawh i hi'tak ziak un, mihiam chawndan, Tantu Lalpa dawilo gual ah bual ta lo in um hileu hin, Mithiangtho, Zotu Lalpa melhiat te hi-

tai tiu in, “Dawi leh Kau” mang ah kikum tuana te’n ei zo ta lo ding ahi.

Setan suak ngawngkaw! apat taddawh i hi’tak ziak un, mihiam hinkhua pumpi hi Pathian temple (Pathian chenna inn i hitau). I taksa chu lei ah siam ahi ziak in, Corona virus second wave Hileng (Hipi) ziak in I vei thei ua, i thithei bawk ui. Ahi’nla, i hinna’u, Lalpa apat piak hinna nei, taksa leivui ah tuam mai i hi’ziak un, Lalpa apat i dawn uh hinna thagau tu-  
amtu taksa hin, haksatna tamtak hun palto nalai ngei ina, Himaleh,

Lalpa leh a thilhitheina chu suang in, kung lam chu del ham ham leu hin, tatsate chawlna munnuam ding ah Lalpa’n a guansa Khawpi chun, mithiangtho melma gâl zo ah a la chawldam masate kha tawh, tawp ni neilo in Lalpa chu chawihawi zing tai tiu.

Dogâl zo ah KHAWPI HAWI lua zo ding in Lalpa’n hun malzawl taken!

<https://www.kanamvaiphei.com/bungpi-thing-leh-mihing-hinkhua/>

--o0o--

# AMEL UH KA ET PHAT LEH PATHIAN MEL KA MU'I.

John 1: 12; Galatians 3: 26

~Dr. S. Chongloi

Catholic nun(sister), Neyda Rojas kitinu hin van nuai ah Suangkul haksa pen ah kihia, Latin America gama Venezuelan Suangkul a chun kum 17 Pathian na ala sem ahi. Zia Suangkul ahin mi 750 um theina ding ah kisiam ahivangin mi 3,000 val um ahui. Government in Suangkul ngak di akawi piak uh ahi vang in, asunga hin miphalou hawn mi zosia chungu vai ahawm ua, meithal hawi taktak le akikawi uh ahi. Thu awilo chu anawp uh leh akawidawk thei nalai uh ahi, akitia.

Miten Leichung ah gawtmun ahi tia ahetau Suangkul ahin Neyda chu lut theina ding phalna apiau ah, aman hin ding dan Khankhua thu leh thiamjilna tawh hukdamna thu ala gen sek hi. Amanu'n, "Lekha helo ten azik leh asimthei ua a kipak dan uh leh Suangkul ah achungthu uh kizikte ahung ki simdaw thei ua akipak sek dan uh chu katha auam in, chuleh amel uh ka et phat leh Pathian mel kamu sek hi" ti'n agen hi.

Suangkul tangte atamzaw chu mihiam khat hin ding dan khel ah siatna nei ngen ahivang un, Neyda in Pathian chate ahui ahia'i. Pathian in a hepi mama ziak ah achapa Jesu

ahung piak thu te agen piak sek ahi. Ama'n, "Suangkul ah umte'n a zalennau achân vangun, aza um nau (dignity) achân diak puau. Insung miten a nutsia lawi le aum tau a. Himaleh, amau a di'n kei uh ka um nau" ati ahi. Suangkul ah kum 10 val nasem khat in, "Nidang ah chun thuak(brain) neucha kala nei in, sister Neyda apat tuhin thuak lianpitak ka nei tai" ati ahi.

Suangkul a nasepna ah nau aneiden sak loi bang aum in, anau chawp/vakzia ahetau ziak un Neyda peziang bang le aum ui. Zia ti gual ah hung khanglian nungak khat in khawnungin, "Ken nu thum kanei hi. Khat chu asunga ka piannna nu ahia, apanina chu

ei chawmliannu ahia, athumna chu Sister Neyda ahi” tin agen hi. Zia Suangkul ah um atamzaw’n Neyda apat in taksa leh thagau mitvakna’n anei un, lekha helo tampi’n le asim leh azik abawl thei tau a. Chuleh Jesu taksang lo tampi’n Jesu ala taksang tau ahi.

Ei un mi gitlo imu phat uh leh bang imu dawk sek uh em? Neyda gual ahin amel ua Pathian

imu daw thei ua, chuleh Pathian chate ahiu I hedawk thei diam uh? Suangkul a hukdamna thu gen ding hi mun kilempen khat le ahi. Pathian chate tampi’n hukdamna thu I gen ding uh ei ngak zing ui. I gen uh taksang leh gingcha zosia chu Pathian chate hi ding ahi tau.

--o0o--

## **AW DELILAH NANG ZIAK AMAW SAMSON, ATHI MAI..! VAIHAWMTE16:19**

~By Mr. Thianlam, Evan. Teacher  
Tonglon ‘D’ Mission School

A hepi mama Delilah hi ama hinkhua susetu ding ahi lam alaki he hita maijen lechu aw.. SAMSON hin alung thim pumpi alapelo hial di hiven maw. Israel te mapuitu thahat mama, Sabiltung khagu mai ale mi asang aja ah that zopa, khawpi kulkawtkhak tiang le paw mang zopa, Numei kamthiam le zaidam mama hile kilawm, lungthim chalak, mani angzung dibep gel, mani lawk

nading ahi phot nakleh mi hinna suksiat le khoksalo nu ang ah ajawi thak tawp mai chu aw athi ma hin vang chu thil um Dan zosia hesuak kei tan tin himaleh Ama adin vang amasang chu hinna di kinepna aum talo ahi. Samson gual ah lhin khuau ah ei tutang, ei la sujawitu, Setan nasepna hin, I kawl awk kha em ti hi nang le kei ki enthak kit leu hin maw, khen khat chu khovel nawp chenna zu



le sa khamthei, Jatchuam chuam, diklo tak a sum le pai hawl khomnate khenkhat kit chu mobile phone, Etsakna'n mobile phone vak mang taleu hin asung ahin mit a munawp ding thil zat chuam chuam leh Game zat chuam chuam leh nakhang ah het thei ding zat chuam chuam mani lung lut nading zui ah ei pui kawi thei ding atam khop mai ahi. Minu mipa, chuleh khanglai khenkhat jiahi ngolpi hial khop ah buai ta. Insung khawsak naleh nupan ki kong kâl le sukha hial ta, Innsung khawsak dan le noplo phâhial ta, I pauchap di hun leh I Bible sim nadi hun zosia leh Innsung maicham I siam na dihun leh, mani Innsung adi nasepnadi hun, chuleh, ziallai te ading ah I lekhasim nadi hun, zia achu I lungthim pumpi kipi lut ah, lhun tamzaw ala mang kha ta le aki hi maithei, I thagau lam hinkhua sumang thai thei leh I lei taksa hinkhua leh I Inchen lochen tiang ah sumang thai thei tu, sualmun ah I hinkhua Samson gual ah imat den khak ah I manthai den khak ding hi alau um talua ahi. Delila'n, Samson hi alungthim pumpi'n ah hepi gual in asulang thei ah, maleh alungthim pumpi vang apepuai ti

imu ahi. Zia gual machun, Setan inle nang le kei hi sual thina khuk ah puilut ei nawp ziak In alungthim pumpi eihepi gual in asulang sek ah, maleh alungthim pumpi vang eipe kêi puai, ti vang hetmil lo aphai. Achung ah thu igen gual in nang in la mihiam chanpi, la lungthim zosia a hepi gual ah bawl in akipal pai na ding labawl kha ngai sek em?

Delilah kamthiam tak chu Samson in angainat mama gual in nang in khovel nawpchen na sual chu hawlo in la ngai na mama sek em? Mihing hinan vang nawpchen na leh sual hi ngainat leh lungthim ah um thei ma ahi. Maleh asung ah kibuallo hâm hi damna ala hin, maleh Samson in jia chu ala hepha pua, angainat bep hilo in, alungthim pumpi toh asung in ala ki bual tawp mai ah. Agâlthe thâng achun ala ki-awk den tamai ahi. I dogâl, thepdan thiampa Setan hin I thagau lam hinkhua manthaina ding ngaituana'n, eima lungthim dawilam jâwng en in jia kipat chun puikawi ah puimang ei gaw zing ahi. "Aw Delilah, nang ziak amaw Samson athi mai..!". Aw thepdan thiam, sual thunei tu, nang ziak amaw ka thagau lam hinkhua

aman thai mai ding ti ngaitua ah, mangthei zing ding leh soal lak  
hinna chung ah thuneitu pa Path- ah kiveng thiam thei din Lalpan  
ian kiang lam zawk ah hinkhua lmau eipui zing taken.

--o0o--

## HUNG PIANG DING AH ALA KIGEN LAWK LAL CHRISTA CHU A PIANG TAI

**By: Lemlian Vaiphei  
Leilon Vaiphei Village**

**Thumapui:** Jesu pian dan hi khawvel ah a la chiata thilsuakte bep hilo, a hungtung ding thilte lak ah tepi ding a le mak leh lopi mama khat chu ahi. A ziak chu a hung pian masang in le Jawlnei ten a hung pian di dan gendan jat chuam chuam'in a la genlawk masat'u ahi tai. Khawvel kum sangsawm umbe nalai lele Ama pian gual a piang hi um puana. Khawvel a mihing taksa lim'pu a hung pian ziang hi maktak ahi. Lei mihing nausen gual ahi pua, khawvel ah mite a ding ah chanchin pha kipak um a hung hi tai. Nausen Jesu pian di a la tângsappi/genlâwk chomchan gen hitiu.

**Jawlnei Isai in:** "Ei uh â dinging nusen hung piang in, chapa piak'in I umtangkal un; a lingkoin thaneina a um ah, a min in Lemguattu, Mak, Pathian Hat, Kumtuang Pa leh Chamna Lal chapa sak ahi. A thuneina khangjel in tin, David lalchutpha leh a lenggam chun kichamna um zing tan a" tin a la gen lawk hi. (Isai 9:6-7).

**Jawlnei Jeremiah in:** Jeremiah in le Jesu hun piandan ala mulawk masa ahi. 626-586 BC

hun lai vel in Judate chu Babylon te khut nuai in ala um'u ahi. Jesu pian ziak'a Judate naupang pawsal kum ni kipat a nuai lam zosia Leng Herod in ala that'a, Juda numeite nausen kithatte zal a a kau thepbi theilo hial ah a hung um diu a la genlawk hi. (Jeremiah 31:15)

**Jawlnei Zekariah in:** Zekariah in le 520 BC vel in Jesu chu thuneina leh lopina pum in Jerusalem kingaitawm tak in sabil-tung tuaidawng chung ngei ah

chuang in a hung hi” tin a la gen hi. (Zekariah 9:9) Jawlnei ten a la tângkopiua a gui-tung jel hi. Di-abol thunei nan le a tutâng thei pua, Juda dân in le a tutang zo lo ahi.

Mihing lunggel ding in le gelphâk hilo nungak thiangtho Mary kipat thil guat dungjuí a thagau thiangtho kipat hung ki zil nausen Jesu chu lei Bethlehem bawngin ah gan ankuang sung ah a hung piang ta ahi. Jesu pian zân a khan mipilte a vachiau a, nausen puan ah kituam a muu a; bokkhup in chibai a bûk ua, sana begaw leh murra te a piau hi. Belam chingten le Jesu pian ahi-at un a kipâk ma mau a, a belam chinnau kipat in a ki pandawk’ua Jesu pianna David Khawpi Bethlhem ah ava chiau a bawng in a nausen chu a muu un a kipak ua, akipaknau a bukim mama hi. Gingu ten chanchin hawi l hiat leh mu teu suk butit a midangte a ding ah le pan l lak di dan zil thei ahi dan muthei ahi. Jesu pian ah belam chingten chibai a va buk gual un khawvel a mithupite pian hiatzingnan sorkar in hiat-pina nei in National/International Holidays a mat aum hi. Jesu pian hi le gam tin ah khawvel

kawl-ningli thusim ah mang talo ding ahi. Jawlneite khang a pat tuni tiang ah lunggil a châmzing, kam a gen leh la a sak zing chulni umtalo ding ahi.

**Thutawpna:** Khawvel a thil pha bang jat um in, kipakna um maleh hun sawtlo in a chul-tha sek hi. Tunin Bethlhem ah Lal Jesu pian hi kipâk um leh tâng sappi in la pang na em? Kipak in pak-na la san Pathian chawihoi hi tiu. l hinkhua mat dan zia kipakna chanchin hi tawh akituak na em? A vaigei a hun a bei man kisutup in; dan leh nutsia in um khan la. Mipilten ten Jesu a va ettua khan thil thupi taktak a nei teu sana, begaw leh murrah te ki phal takin a piau. Pathian chawihawi leh kipak pumin akile kik gual un, Ei un le l lunggil tak’un, l taksa, l nei leh go nei kham kham Ama a din kiphall tak ah piak a pawimaw hi. Thina kawkhuk kipat kumtuang hinna ei chansak Lal Jesu kipakna leh l chawihawi theina pen hi ding ahi. 2021 Merry Christmas leh New Year 2022 a nawpthei pen a mang ding in l kichial a, mangtu zosia Lalpan a van tukvan hawng in a malsawm nan hun vuk ta hen.

(Kumlui Thak zan Sermon)

## **Thupi: Kisiik a Nunlui Paithaak.**

**Bible: II Kor. 5:17; Hos. 6:1-3; Mat.3:1-3; Rom 13:11-14.**

*By: Rev. S.T. Kaia Vaiphei*

**Thumapui:** Pathian in I phatlona leh titlonate tamtak um maleh kum tung keei ah I mau ei pui a, I gitlonateu ei thuk lo a, tu zan a hin kumlui tha thei ding ah I um taak ziaak un a masan kumkhat huitung ni 365 ei pui galkaitu Pathian chu lopina chang ta hen. Tuzan a hin I kumlui gitlona zosia paitha ding in Pathian min in ka hun chial masa ahi.

**Kumlui Hinkhua Mat Dan:** Tuzan a hin kumlui sung pumpi ah I hinkhuau mat dan teu nung suut kit hi tin uh; Pathian daw lo gual ah I khawsaknau, I gamtatnau zosia Lalpa kengbul in thupha chawi hi tiu. I hindan lui uh I paithaak ua, hinkhaw thak I mat lo uh ahi chun suachatna ding lampi a um pua, gitlona lampi I zui zing uh ahi chun nikhat tei chu taksa leh thagau ah mangthai ngei ngei ding I hui. Zia hun chu a tun masang in unaute haw I gitlonau thupha chawi in sim hi tiu. Thisan ah tatlo Lazar bawn, van Kanaan tualnuam ah a lut leh, thisan suak ah ei tatte nang leh kei bang ding ah thi ding ah leitual ah lum den mai la hi tam, Unau, kipan in la; hung tho daw k in Lalpan a ngak hi.

**Sim ding ah Chialna:** Baptistu Johan thu tang kopi pen chu gitlo simna ahi. Lal Jesu chu hung ding ahi taak ziaak in ‘La lung heion, vangam a nai tai,’ ti hi ahi. Simna Baptisma Jordan lui a chun a chansak a, a takleh a leem septu Lal Jesu chu a hung ta, gapha ga lo ta phawt phuk in mei lak ah pai ding ahi, tin a gen hi. Ziagualmachun zawlnei Isai in le gamthip ah a la gen chu ‘la lung heion; vangam a nai tai’ ti in a tangkopi hi.

La phuaktu chun, “Hung kihei kit tan la aw mangthai sa, ngaitiam un tuni hin lal in a ko, ngaidam ding in leh silthian tho ding in, kimupi gang in la vaigei lo in. Lungsiat tak in a ko in a ngak hi, ngaipha tiam in a kona aw chu; Lungsiat tak in a ko in a ngak

hi, hepi tak in ka kiang hung in ti'n. Unaute haw, A la ngak zing hi bang dia muang la hem? La manthaina sawt tak hi malehle, nang pang lo in a kipakna a kim thei diak puai. Unaute haw, Hosea gen gual in, "Hung un Lalpa kiang lam in kile kit hi tiu, aman l gitlonateu leh phatlonateu ziak in eila vaw liam ta maleh ei tuam dam kit ding ahi. Taksa leh thagau ah dam la nuam em? Tu ah la hinkhua matdan a hin la lung a awi tak tak nam?"

### **Khawvel Limna:**

Zia khawvel limna pakzu chawp ah muang ah l um lai in, setan in ei kantawm in kumtuang gawtmun lua ding in ei hen det a, ei in la zia chu hepha lo in-hinkhua l nawpdan dan in l mang a, khawvel hi a zap in l zap thaw a, l hiatlo kal in l inchen khaw-sak a niam deu deu ahi. Khawvel pakzu chawpin l ne, l dawn a, l lung a awi tak tak chuam diak pua, l kipakna a kim thei chuam diak pua, La phuaktu chun, "Sang tamtakten a hawl ui lopina; mu zolo in thanmual a khum zo tau, lopina lim a hawl ui sum zing bang, mu leh changten le a nei den thei puau" a ti ahi. Unaute haw, l lawi leh pai ngaita-

kten kipakna, lopina leh limna a hawl ua, mu zolo in thanmual a khum zo tau. Khawvel a hin nuam in leng maleng le mangthai ka la hi. Maleh ka Lalpa hepina lopi chu gitlo sim ah ngaidam. Lalpan zi nawl nung kokit gual in ei kokit ahi. Hosea zi chun a pawsal nusia in thanghuai tak in pawsal-dang tawh hinkhua a va mang ah, a kipakna a bukim chuam pua, a pawsal kiang in a hungkit a, a pawsal chun kipak tak leh hepi tak in a la pawm kit mai ahi. Thadou la chun, Leiset lopina ka hawl lai in, Ka lung sung a konthu hin sei chun, lamvai nang hung kile tan ei ti. Ka pakai tai lo ken muanpi nei lo, ka lamvaina a kon ei hin tiam, a ti ahi. Zawlnei chun, ka miten thil pani a hi khial ui, kei hinna tuikhuk ei hemil un, ei nusia un, amau ding in tuikhuk a kisiam un maleh a tuikhuk siam ua chun tui kiting den thei lo ding chu, tin a gen hi. Unaute haw, kipakna ding leh lungawina ding l del teu hi Lal Jesu pang lo in thina lam a la hi. Kipakna kim, lungawina kim ei pe thei puai.

### **Chapa Taimangpa:**

l hiat chiat sa gual in chapa taimang pa chun a u pa gochan ding le a la khawm a, sum

tamtak chu kipuak in gam gamla tak in a chia ta, sum a nei lai sia chun a lawi leh paai ding a tam a, min a lungsiat a, a ngainau a, khawvel limna zu leh sa, nawp-chenna dang dang in a kibual a, hunsawt deu nung in a sum a hung bei ta, lawi leh paai ding leh ngaainalungsiattu ding a nei ta puai. Kuaman la a inn un a tun-sak nuam ta puau a, an nek sak ding la a nei ta pua, sum la a nei ta pua, a tawp in mi vawk an pe ding in lou lam in a chia ta, a gil a hung kial tak tak phat in vawk an baal hawng chu le a ducha ziang tai. Tai kisip hial ah a hung um phat in a hung kingaitua a, ka pa inn ah suak sumlawten nek sen loa nei tam siat uh tawh, kei la zia hin gil kiang in thi ding ka hi tan, tho ing ka tin, ka pa kiang lam zuan kit tang ka, tin thupuk-na a hun siam ta, thi leh thi ti in a hung kipatdawk phat in a pan gal gamla tak a pat in a hun gal mu ta, a hun del a, a chapa chu hepi tak in a chawpngawingawi ta ahi. Hung kipan lo hen la hi leh a umna mun a chun thiden ding ahi.

Unaute haw, I nek I dawn lim in lawi leh pai ding le I hau a, sum leh pai le I hau a, I tak-

san le a cho a, maleh hun hung chia in inchen khawsak in hung zawngkhaal tiat tiat hi tin, mi ngainat law lo deu deu hi tin, I taksa hung zawngkhal tiat tiat hi tin, a tawp tak leh ngawl thei ta pua hi tin, eima ei hung le nek zaw tan tin, chapa taimangpa gual ah thi leh thi thoiing ka tin ka pa kiang lam zuan kit tang ka tia la kipatdw ziang lo ahi chun la umna a chun thiden tei ding la hi. Gilo in Pathian taisan maleh chun a phatna, nang a hun hepi-na a chul diak pua, ama tuk ah hun lungsiat ding dang khawvel a hin a um diak puai. Kile kin in la vaigei masang in a hun ngak zing ahi.

### **Pathian Ngaidamna Thutiam:**

I gitlonau bang gualin sandup ziang leh le ama kiang ah I kile kit chun ngaidam zaw lo a nei pua, maleh dan leh la ti ahi chun hung kikhel ding ahi. II Chro. 7: 13-14, a chun ka mite a hung kingaitawm ua, a hung pauchap ua, ka mel a hun hawl ua, a gitlonau lampi a hung kiheisan phat ua leh van a pat hun ngaitaang ka tin, a gitlonateu ngaidam in, a gamuh hi dam ding ka hi, tin a kitiam hi. Isai 55:7 a chun, mi nunsia chun a siatna lampihaisan

hen la, mi diklo chun a ngaitua-  
na diklo chu haisan ta hen, Lal-  
pa lam ah hung kile kit hen, a  
chung ah zangai in a, I Pathian  
kiang lam ah hung kilekit uh hen,  
aman a la ngaidam ma ma ding  
ahi ngal a, a ti ahi. Isai ma chun,  
1:17 ah la gitlonateu chu sandup  
ziang maleh vuk gual in vam in  
a, a ti ahi. Tichun I puanteu hi lo  
in I thinlung puanteu bawt thekhi  
tiu, ama chu mi lungsiat thiam leh  
jangai thiam, lungniang leh lain-

atna dim mi gawt ziang lo ahi  
(Joel 2:13).

Pathian muten a kipak  
ziau thu in a gen seng puau a,  
gam liantak ah lalpen a chut  
sang in Jesu nei ka nuam zawi,  
tin la in a la phuak uh ahi. Unau  
la gitlonate thupha chawi in la  
nunlui paitha tan, tichun kipakna  
kim chu mu'n la.

Lalpan a thu malzawl ta hen,  
Amen.

--o0o--

## Thupi: Christmas Matding Dan

*By: Rev. S.T. Kaia Vaiphei*

### Christmas hung kipatdan:

Christmas chu “Khrista  
Luai” ahiloleh Khrista hiat jing-  
na luai tina ahi. Chun, “Khrista  
pian Champha Lawpna luai”  
ahi. Christmas hung kipatna leh  
kimatna jiak pen tak chu, Jesu  
Khrista, Pathian chapa, khawvel  
hukdam dinga ahung pianna chu  
ahi (Lk. 2:11).

Romte lal lain, Lalpen Au-  
relian chun Rome khawpi ah “Ni  
pathian, jawthei ngailo” tia agen  
uh Mitra adding bik a kut mat  
ding avaisawma, AD 274 Dec.

25 akhan ala mang pan taua,  
jiagual a ‘Ni pathian, jawthei  
ngailo a dingah kut ala mat uchu  
Khristian te dingin alem chang  
thei ta pua, vangphat umtakin  
Khristian ten ginglote pathian  
dothuk kitna ding ah phachuam  
leh lemchang takin Jesu pianna  
ni Dec. 25 chu lawm in, anit thi-  
angtho tau ahi. Khristiante kutpi  
pawimawtak ahung hito jel ta,  
gingloten jawgual lo pathian  
ah angai uchu Jesu Khrista leh a  
pianna lawpna chun zo in, ahun  
chawndawn hial tai. Rom koch-

uam chun AD 335/336 akhan lopitak in Khristmas hi ala lawm pan ua, zia chu Rom mite calendar 'philocalian Calendar in akilang hi. Tichun aban ah hung kimang to pek in tu hin Khawvel pumpin kut lianpen, luai lianpen ah angai khat ahung hitai.

Mimal, inkuan, Koch-uam, leh pawlpi tin le nasatakah kisingsa in kitua tua in, ann te nekhawm in, Christmas card leh thilpiak te kipetua in, kochuam te chun pathian biakin ah kikhawpna programme siam in, inte chei in, vanthak te kivan in, Jesu pian thute gen in, lasak khawmna te mang in, Christmas carol te nei ahisek hi. Zia hun hi khawvel hukdampa pian hun ahi jiaak in taksa leh thagau lam ah limna leh mal-sawmna dawn hun ahia, ajawng ahat kuama sap in ingakla ma ma chu ahi.

### **Christmas in ei hil:**

1. Pathian mihing ahung suak hi: Kumtuang Pathian chu mihing hung kisuk in, nungak thiangtho in a hinga, zia hi bangkim hithei Pathian bep in ahithehi ahi. Bethlehem ah ahung pian hi Pathian thutiam sukpitin na ahi.
2. **Khrista achun Pathian mizia**

**leh nungchang akimuthei hi:**  
Bible chun Pathian chu hepina Pathian ahithu ei gen a, zia hepi Pathian chu Jesu Khrista ah akipuanna sanga kichian zaw ah akipuanna dang him himm a um puai.

3. **Khrista kingaitawmna:** Mihing hina bukim anei theina dingin khrista chu ahung kingaitawm hi (Phi. 2:5-10). Hukdam ngai mihingte hukdawk dinga mihing ahung chan hi alopi takzet ahi. Zia ala kipakpi mihing chu hukdam in a um hi. Mihing pangai dinmun sanga le niam jaw a hung kipat jiang hin mi nuainungpen pen te le ahuapzo hi ti ataklang hi.

### **Christmas Matdan Phalote:**

Zia gual lawm a Pathian in a hepina athumai hiloa, achapa ngei pia, khawvel ah ahung sawl, lawpna leh chawihawina hun ila matdan uhi ala diklo sek hi.

1. Kisuklimna hun mai ah mat chu adik puai. Ahun tun masang apat kisuklim ding lampang ngen tup ah ikisingsak sek uhi adik puai. Zuleh khamthei thil hawtawh mat leh jiaagual thil bawlpatna hun ah imat uhi chinlo hial ding a pha ahi.



2. Hal puak, meithal, chapang te chawisak bawl sak hi eima christiante a ahi pua, kawl leh vai te chindan ahia, sum senna bep ahi.
3. Sill eh chen thak nei ngei ngei dinga ngaidan inei uhi a phapuai.
4. Khawlai leh pawlam ngen ah matkuat hile adik puai. Chut khawvak tei tei ding a ngaihte, thil nekkhawmna lemchang ah ngai te hi thil dik ahi puai. Eima inn ah kineva chiat ta, hundang ah bawl jing le his-amlo, Zankim vel ah tampitak nek hi aphapuai.
5. Pawlam ah hun mattam takluat leh Zalen talua umhi sual ah pukna lemchang ahisek hi. Zia chu pumpel kuat ding ahi.
6. Khristmas umna ziak leh Khristmas siamtu penpa chawihawi leh pakna dinga matlo leh pak peilo hial khawpa haksawt leh thachawl te hawhi, taksa adding bep hilo in thagaulam tiang a hatlona tuntu ahi.

### **Christmas Matdan Pha:**

Khristmas hunlai ahin gingtu tak leh tak lo aki he bailam ma ma sek hi. Lal Jesu mamaw leh hepitu chu kinawptelna lam in kimang ngai puanna tichu aki

chian mama hi.

1. Belampute leh mipilte gual ah chibai bukding ahi. Christmas mang masatuten chibai abuk ua, ama anga kngaitawmtakin chibai ala buk ua, zia hi entawn hitiu.
2. Mipilten ago lul teu apiau a, ama chawihawina dinga sum leh pai senso leh neizolote kianga panpina piak aphai. Zia ban achun, golul pen lunggil hi piak ngei ngei ding ahi. Ama ahung kipiak thiang suak kei gual in gingtu chu ama aki piak thian suak kei ding ahi.
3. Kochuam programme hi apha-thei pen ah mat ding ahia , lenkhawmna pankim chiat sekding ahi.
4. Eima in chiat ah aheilai sia kintak ah insung kikhawpna neitei apha, jia chu gitlona apat kivenna phamama ahi. Christmas neitu kianga inkuan a titakjet a kilakna nei hi a pawimaw hi.
5. I luaitthenau hi Lal Jesu kipakna luaitthena ti hiat chiat aphai. Mipi luaitthena pang tei tei dinga kingai khawk chiat ding ahi.  
Khristmas hi khawvel hiat leh mu ah Lal Jesu taklatna hun lopi ahijjak in ginglote mitmu

ah ama kisuk minsiatna ding leh masawn ngei dinga thiango  
gingtute sukualpho ding lam- tak ah mat chu Pathian dawilam  
pang in kuama tawida thei leu hingeri ina.  
hin. Ginna leh thagu hinkhua ah

--o0o--

## MAICHAM CHUNGCHANG

~Rev. S.T. Kaia Vaiphei

**Thumapui:** Maicham I hiat dan uh leh matdan uh hi siamdik ka nuam a, Bible ah a hung kipat dan sui masa hi tiu in, zaw tak leh eimite hiat dan leh mat dik ding dan gen ding I hiu.

### Maicham Hung Kipatna:

Maicham ti hi Sappau in Altar a kitia, Bible (King James Version) in 433 vei a kilang hi. Maicham hi Latin pau ah Altare ahiloleh Altaria a pat hung kipan ahi. A thumal hung kipatna chu Latin pau ah Altus ahia, zia chu Gk. ah Airo tawh kibang ahi. A umzia chu a sang dawk tina ahi. Latin a chun a sang genna ding in Ara a mang kit ui. Gk. Bible masapen Septuagint (LXX) a chun Maicham tina'n Bomos a kimang a, zia chu ginglo miten a pathian kiang ua thilpiak a lat seknau maicham kigena chu ahi. Thuthung lui hun ah Israelten halmang thillatna a lat seknau mun

chu Thysiasterion a kitii. Zia chu Pathian puanbuk (Tabernacle) ahiloleh temple ah um ahi.

### Maicham Umzia:

Maicham chu leitual a pat a sang dawk ah siam ahia, a ziak chu Maicham ah thillat kikawite chu a buaklona ding, a thianthona ding leh ginglo miten a van pathian uh tawh a thillatteu chu a kinaina ding ti ngaidan a hung kipan ahi. Zia maicham chu pathiannu (deities) kiang ah thil latna a la kimang sek ahi. Maicham chu Pathian biakna thillat ding kikawina chu ahia, zia chu thing ah kisiam ahi. Temple/Biakin ah thillat dingte sa kithatte, halmang thillatte leh bu leh thai

chi chuam chuam Pathian kiang ah kipiata kikawina chu ahi. Zia hi khawvel ah Sakhua chuam chuamten le a mat uh chu ahi.

### **Bible ah Maicham:**

Masang lai ah Hebraite chun maicham chu lei ahiloleh suang in a siam sek ui (Exo. 20:24-25). A hun nunung lam in maicham chu thik leh sum-eng in siam a hung hi tai (I Kgs. 8:64). A til a chun maicham chu Pathian hung kilakna mun ahiloleh Pathian in a tina mun in siam ahi sek hi (Gen. 6-7; Deut. 12:5, 13-14). Sakhua dangte a bik in Greekte leh Romte chun Maicham chu Temple sung in a kawi sek ua, zia chu pathian chenna mun ah a ngai uh ahi. Zia chu la in Maicham chu temple sung bik ah kawi a hung hi sek tai. Acts 17: 23 ah I muu Paul in Athen khawpi a tuak khak “Hiatlo Pathian ding ah maicham” ti a hin Septuagint in bomos a mang a, Tichun Judate temple chun Thysiasterion a hun kaw k bik ta ahi (Mt.5:23). Zia hi Rev. 6:9 ah van ah maicham a gen hi le ahi. A nunung zaw k kimatna chu Heb. 13:10 ah bep mu ahi.

### **Maicham Hung Machal Dan:**

Kochuam pate (Church Father) hunlai ah Sacrament mai-

cham a chun Thysiasterion a la mang ua, a ziak chu Sacrament chu kilaltna hi ah a ngai ziak uh ahi. Hun hung chia zel in AD 110, vel a pat Sacrament dawkan (Table) Trapeza leh Thysiastrion maicham hi mat khawm a hung hi pan tai. Zia chu kochuam siamphatute (Reformers) ten a hun sun zawm ua, a maicham chule thing ah siam a hung hi tai.

### **Maicham Kisiam Dan:**

Nicaea khawmpi zaw in maicham chu mimal in ah bawl pat a hung hi ta, maicham size a til ah 36.44x 34.20 metres hi sek chu mimal in (house) lemchan dan zil in sukneu a hung hi tai. Maicham chun keng 1- 9 tiang a nei sek hi. Maicham chu ningli nei, (Rectangle) lim ah kisiam, a umzia chu a dung leh a vai letdan kibang lo deu a kisiam tina ahi. Malai namdang mite pathian maicham chu sang sek ma ma lehle Hebraite maicham chu chuti tak in a sang pua, a san feet zia zat hi hiding ti thupiak le a um chuam diak puai. A til a chun maicham chu dawkhung hi tawp mai ahia, temple sung ah um a hung hi phat in ningli nei ah siam a hung hia, dawkan (Table) gual a hung hi tai. Thil kilat ding

tam leh tawm zil ah lian leh neu ah siam ahia, chawmkhat zaw in thillatte kawituupna ding in a sit nei ah siam a hung hia, tuhin dawkan gual ah a sit umlo a hung hi kit tai.

### **Tulai Eimite Maicham:**

Tulai ah ei uh maicham hitdan hi a dawkan(Table) ahem ahiloleh a mun lam sang in insung mite kikhawp khawmna hi maicham I ti tau in ka hia, zia chu a dik puai. Maicham hi insung kikhawpna/Pathian ho khawmna tina ahi puai. Maicham chu a masapen in Pathian kiang ah kithawina/kilatna ahia, a ban in a dawkan chu ahia, chun a dawkan ah Pathian a ding ah thilpiak kikawi dawk chu a hi kit hi. A dawkan bep kawidaw a, thillat daw a umlo chun maicham a ting chuam diak puai. Insung mite Pathian ho khawmna chu a chuam ahia, maicham chu a chuam ahi. Mi'n maicham a siam chun Pathian kiang ah latdaw thil a um tei tei ding ahi. Chun Pathian a ding ah I thil latdaw chu eiman kinung lak kit thei taaklo ahi. Bible gendan in mi'n Pathian a ding ah Maicham ah a thillat chu a kitat ding ahi chun a man ding zat chu se nga sua ah se

khat belap in tin a kitat ding ahi (Lev. 27:13). Chun maicham ah thil kituak latna chu midang in a bawl theilo thiampu kin ahi. Tulai ah thiampu chu Pastorte, Upate leh kochuam in a namdette (ordained) chu ahi. Maicham ah thil kituakte chu midang in a kilak theilo, a lantu thiampu chan ding ahi. Himaleh biakin ah thil kilante leh kochuam programme ah maicham thillatte chu vang a lantu chan ding ahi chuam diak puai.

### **Maicham mei kuan zing ding ziak:**

Bible in Maicham tamtak I muu a, ziate chu ziak chuam kithawina maicham ahi pen hi. Gitlo kithawina maicham a chun thillat chu halmang ahi sek a, zia thillat kihal khu chu van lam ah a khut to a, a gim chu gimtui ah Pathian kiang a tun ding ahi. Maicham ah halmang thillatte chu phatak ah a kaak vam theina ding leh a gim chu a namsiatlona ding, a uilona ding in maicham ah mei chu a mitlo ding ahi (Lev. 6:13). A thilona ding in thiampute chu a thingkho sawn ding ah a kithaak sek ua, a thingkho sawn ding routine a kisiam sek uh ahi. Tichun Maicham chu a thil (dawkan) chu ahi bak in Pathian

kiang ah kithawina kisiam a thil- kilatna maicham mi zosia hin l  
lat chu ahi. A umzia chu Pathian pawimaw zing uh ahi. Lalpan  
masang ah gimtui a l kilat zing simtute zosia ei malsawm piak ta  
theina ding un nisin kithawina/ hen.

--o0o--

## DIK LASA EM?

By:- Rev. N. Dalla

1. Mi'n la chung ah a bawlkhial na a ki hiat ziak ah ngaidam a dawt lele, ngaidam thei ma malo la hi chun, mi vântâng nuailam pek ah um nalai hiding la hia, chuleh, setan lampi zui nalai hiding lahi.
2. Mi'n a sukkhial na kisik ah la kiang ah ngaidam a dawt leh, ngaidam ziang thei lahi chun, mi pa'ngai hiding la hia, chuleh mihing lampi zui hiding lahi ahi.
3. La chung ah thil hi'khial tu chun ngaidam dawn khello maleh la ngaidam ziang thei a, la puakdam ziang thei a hi chun, mi vântâng chunglam pek ah um lahi ta, chuleh Pathian lampi zui lahi ta ahi.
4. Khawvel thil tak achun ngaidamna ding ahin, a man piak ding thilkhat bêk phût in a um tei sek ah, himaleh gospel ahin vang, phût bangma neilo in, melma ngaidam zawna thugûk ala um ahi
5. "Pathian thu hi ahing ah thil a hi'thei ah" ti ahia (Heb.4:12) a umzia chu vaihawm thiamna haw, gênthiamna haw leh septhiamna haw lam sâng sângin, eimau ah sual um pen hi a zaw ngei ngei ding ahi ti'na lam ala hi zaw ding ei vei..!
6. Thugen thiam in, la sa thiam in, mi za'um takin um ma leu hinle, gospel in eimau ah sual umpen hi a zawlo chun, Pathian thu thil hi'theina hin, eimau ah na a sêm puai ti'na hiding ahi.
7. Pathian thu lamdang na chuh, "chemjam hiamtua" ti'cha hi ei vei..! zia chemjam hiamtua chawitu taphawt chun midang a sutliam masangin ama a ki sunliam masa ngei ngei ding ahi, ti'na ahi.
8. Tulai ah eilawi in i Pathian thu chemjam mat uhi, a hiamtua hilo in a tûkna (aga) um ala hi sek ziakin, midang sun kha kha ziang, eima ki sunkha thei him himlo, ti'haw hi atam in a kitam talua ta ahi.

9. Mihing in i hinpiu pawimaw ma ma ziang khat chu mite pau in gên tale'i, "principle" nei ah hin hi a hia, principle neilo mihing kiti mawng mawng chu, hau henla, bawlthei ma ma lele, hinkhua value bei hung hi tho tho sek ahi.
10. Principle neitak, party khat apat party dang ah chawm vel vel ti a um ngai pua, a pan panna ah gin um tak pang fan fan ziang kiti haw hi mi principle neite hindan ala hisek uh ahi.
11. Teksete'n "Uicha a hâtlam lam in a pang hi" ala tiu hi, uicha â ding achun a kilawm him ah, a hi'nla mihing in zia uicha um gual gual ah a hung um phât tak ualeh, a ki lawmna zosia bep hilo in, a za'umna zosia le aki sukman tasek uh ahi.
12. "Sum in thil zosia a hi'thei hi" kiti sek hi a dikna tiang um maleh, principle nei, mi kitak, a dikna ah lawsap le khawksalo, lawkna ding a hi phawt leh ti zianglo, thutak hângsan tak ah dinpi mai kiti haw â ding in, zia sum chun thil a hi'thei diaklo ahi.
13. Tulai i khristian khawtang hinkhua'u sang in, i gam ua Pathian thu a hunglût masang, i pu i pateu khawtang hinkhua a khan, khristian khawtang hinkhua diktak ala umzaw ahi.
14. I gam khantona i ti hawu hi, nêk leh châk ah khantona, nei leh lam ah khantona tite haw hi ahia, khat leh khat ki sawmdawl leh ki hepina lam ahin i niamsuk hiai hiai tau ahi.
15. Vaihawm thiam mipil i nei masang ua khan ki thungaina leh ki hepina ala umzaw, tu' mipil leh vaihawm thiam i hung tam phât ua hin, i lak ua hin ki tuaklona leh ki bung khenna a hung nasa deu deu zawta ahi.
16. I hâtlo lai leh i vaichât lai in, ki ngaitawmna leh Pathian hawlna châng i la hezaw, tu'hi a kham kham ah neizo leh bawlthei i hung kisak phât ua hin, lungthim chaponan i hung dim ua, Pathian hawl-na châng i hun he gam talo uh ahi.
17. Mi phalo leh mi dukdaklo iti teu haw hile a gilo nuam mawng mawng ah chuti um le hi khello, a dinmun leh a chansiat bêk ziak ah hung gilo dawkkha ti'le umthei talua ahi.
18. Nawchizuak itiu numei chavai ah i ngai uh i gam ua tamtak um haw hile, a phalo nuam mawng mawng ah va chuti umkha le hi

- khello, a insung dinmun siat ziak ah, hepitu ding le neilo ah vang-sia kusak tâkluat ziak ah chuti umkha le umthei talua ding ei veu..!
19. I khawtang leh i society te hawu hin khamthei bawl leh a ki zuak iti teu haw hi kawidan chuam khat in i kawî tau ah, amau â ding ah mun i piaklo ziak un a pha dilai le phathei lo ah mangthai den tampi umta ding ei veu..!
20. Mi lungthim pa'ngai nana na chun, thil phalo bawl hi nuamsa ma ma hilo hial ei veu..! lungthim natna nei ziak ahem, genthei leh vangsia kusak tâkluat ziak ahem ah zia thil phalo chu va bawl ah, bawl zawngsak kha, haisan thei talo ti haw hi atam ah ala tam ding ei veu..!
21. Nupa'n tamtak ama ni kidawi ziak ah kicheng la hi ngal, lungthim leh ngaituana ki kawpvâi theilo hial mi tamtak a um uh ahi.
22. Numei a pawsal hiatlo kâl ah "lawkna ding hawl kahi" ti ziak ah sumthung sumpâi la' ah, bat leh thâm tampi pi ala nei ziangte insung a chun, insung limna leh kipakna mu'ding a umthei ngailo ahi.
23. "Numei pil in a inchên a ki siam hi" kiti hi, sum a hawl khen, nei leh lam tampi pi a chawmkhawm hi, ti'na lam sângin, a chenna te leh a pawsal a za'bawl thiam leh, zia chu a inchên siamna hizaw ahi.
24. Nupa'n hinkhua hisello talua hin, chate hung khanletna ding hiselna nasatak in a susia, nupa'n diklo tak ah pankhawm thiamna hinle, chate thagau lam ah khanletna ding nasatak in a subuai ahi.
25. A buai ah buai ma ma ziang awchât a um ah um ziang mi a um thei ua, thawveng ah thawveng ziang, buai pi dile bangma neilo, awchât umlo hial ziang ti'le mi um thei ahi.
26. Sêm sêm ziang la hi ngal pakchât lawlo hial ziang ti'le um thei ahia, sêm talualo lele pakchât law law ziang lawi le mi ala um thei zel uh ahi.
27. Mi taima kiti hi mi damthei te khel khel ahi diak puau ah, a hi'nla a taima nana na chuh dam le a damthei deu tei tei sek uh ahi.
28. Natna kiti hi a umlo chu ahi pua, ahi'nla mi taima leh mani ki sawizawi pei zingte chu natna a veila deu tei tei sek ua, bawl dile hawlo, mawk um um ziang, a tui tui ne ne ziang kiti hi damtheilo

- kipatna ala hi nuam ei vei..!
29. Samson hâtdan chu khawvel ah mi hât pen ah hiat ahia, himaleh ama leh ama a ki thu zawlo ziakin, Delilah âng in a puk a, mualpho takin a melma te tawh a thikhawm tamai ahi.
30. David le naupang cha ahilai apat in a hâtna a hung kigên pan ah, gamsa lau um taktak te bang hung that in, philistine milian Goliath bang ahung that zo ah, himaleh ama ah sual um a tha zawlo ziakin, Bathsheba âng in a pûk ah, a mualpho dêl tamai ahi ai khah!
31. Joseph kha mi hâtlo tak ahia, a suapi ten dung leh vai ah a se'mang vêl vêl ukha ahia, suak leh sal ah zawk mang vêl vêl bep ala hi, himaleh ama leh ama ki thunun zo mi ahi ziakin, api Potiphar zi nasan in azo pua, suangkul thimtak inle a tutang zo diak ta pua, adikna chu Ni gual ah hung vâk in, vaihawmtu lopi takin a hung pang tamai ahi.
32. Paul in "ka hâtlo phât si'n leh ka hât sek.." ala tia (2 Kor. 12:10) a umzia chu taksa lam ah mi i phâk zawlo nau haw hi, thagau lam ah i hât zawkna diu ala hi dân ahia, eilawi in taksa ale hât di thagau ale hât di ila ti khasek ua, taksa thil ah hât tâkluat hi, thagau lam ah zawnkhal na ala hinuam ten ei vei..!
33. Mi'n thilkhat ahung bawldaw leh, ama bawl gual gual ah thildang khat hung bawl pai ziang sek kiti haw hi, mi nammawl ihi nau taklatna chikhat ahi.
34. Vengkhat ah dukan bawl khat ahung um leh dukan bawl ding hung kichuh ziang, thil zuak khat ahung um leh a zuak nuam ngawn hung hi kît ziang tite haw hi, changkanglo i hinaw etsakna ala hi ahi.
35. Election ahung um leh la aw awh.! ki awt tua nuam khûk la ki umlo, a ding nuam ngawn, a ding nuam ngawn kihi tamai,! din khawm dial dial ah kiak khawm dial dial zel mai chuh i mabâk diu hung hizel mai didan ahi.
36. Pathian thugen nuam i tam deu deu ua, Pathian thu awi i tawm deu deu gual un, gam leh nam â ding ah ki pedawk i tam deu deu ua, i gam i nam hepi tak tak i tawm deu deu uh ahi.



37. Puitu thagau mi chun a sepkhawm pite dinmun a hiatthiam pi a, a tilkho zing sek ah, tisa mi puitu chun vâng a sepkhawm pite dinmun him him hiat phâk pi loin, ama ma khua ding bep a ngaitua sek ahi.
38. Puitu thagau mi chun lâinatna thûktak leh hepina giltak nei pum in thu a ziltit sek ah, tisa mi puitu te chun vâng a mawpuakna suk pi'tinna mai in na a semsek uh ahi.
39. Puitu thagau mi chun a seppi te kupalna ding leh siatna ding bawlkhak ding lauthawna anei thei ua, tisa mi puitu te'n vâng, a seppite kupalna thei ding bawl chuh lauthawn na'n a ngailo uh ahi.
40. Puitu thagau mi chun luchang hi'na a chu'tun tun ngai puau a, a seppite dawisakna a pezaw sek ua, tisa mi puitu te'n vâng, luchang ah panlo khâk ding lau in maipha hawl in a tai vêl vêl sek uh ahi.
41. "Ui in a luak dawsa a ne kît in, vawkpi ki silthiang sa buanthuak lak ah ki bual dîn a chia kît hi" (2Pet.2:22) ti'hi ganhing â ding in a ki lawm him ah, mihing â ding in vâng thil za'chât umtak hisek ahi.
42. Mi thil i piaksa lâkpiak kît, a pha puai i tia i haisan sa, va bawl kît, Pathian min ah ila ngawlsa, va nêkkît, va dawnkît, tite haw hi, ui in aluak anêkkît leh vawk kisil thiangsa kibual kît tawh kibang chet hita ahi.
43. Biak insung ah gospel tak ah um hi, thil haksa talua ei pua, khawlai leh mipi ki khawpkhawm na vêl ah gospel in eimau ah mun a nei zing nam? ti'hi ngaitua chian a pawimaw ahi.
44. Social thil ah ki khawpkhawm na a um phawt leh a khamsa hunglût, a gilo disa hung kisa ziang sek haw hile "khrisian insung ah hung kipan kahi" ti tho ding ahiu a maw!..? lungkham umtak vâng ei veu..!
45. Election ah lawtin ding ahi phawt leh bang party hi ziang lele khawk salo ah chawm vêl vêl tamna gam ah chun solkar ki tûp tak leh muan um tak a umthei tak taklo ngailo ahi.
46. Gam sungah mipi vêngbit ding ah sepai tampi pi vâk metmut ziang tamna gam ah chun, mipi zalenna a umthei tak tak ngai puau, lung lînglâu na leh beidawna ahung tung nuam zawsek ahi.

47. Gam zalen gam ta phawt achun, khawpi sung leh civil lak in sepai mu'ding a um ngai pua, sepai kimu tamna gam ta phawt achun mipi in zalenna a neithe tak tak ngailo uh ahi.
48. I gam uh a zalen tâklo dân dân hi, la ngaitua kha ngai em? i khawpi sung teu haw bang ahin sepai kiti mawng mawng hi nikhat bep bep ki tawlmang siksek ta bang leu, ki ki bulu tua in ki ki thattua gam siksek tawl maithei ding ei vei..!
49. Khawvel hawina leh nawpna iti teu hawu hile, i vak tha'ngai ten sek nau ah chuh! ngaitua tia! Thugentu chun "Thil zosia hi bangmalo ngen ahi'n, thil zosia hi bangmalo ngen ahi" ala ti ei vei..! (Thugentu 1:2)
50. Hausak hile i nuam ten nau ah, mi hausa tamtak hauman le umlo, hau vaicha iti diam? hau genthei iti zaw diam? In lopi tak tak sung ah lungthim chawldamlo hial ah khawsa haw imu phât takleh awchât a um ngailo hial ei..!
51. Mipil haw bang i vak awtcha, lunggêl thiam leh thil vak guanggal thiam haw bang i vak hi nuam ma ma sek ua, thâtnawp le a um him ah, ahi'nla zia hi ngaitua tia, "Lalpa'n namtin lunggel chu bangmalo a chansak ah, mitin thil guanggal chu bangmalo a suaksak sek hi" ati ahi. (Sam 33:10)
52. Khawvel lopina leh nawpna haw hi nawpsakna chu ala hileh, Solomon khêl ah mi nuamsa, khawvel ah kuama um khello ding ahia, nawpsakna chitin ala chênpa Solomon chun "bangkim mai hi bangmalo mai ahi'n, thil zosia hi bangmalo ngen ahi" ala tita mai ai chulah! (Thugentu 12:8)
53. Nasemlo hial mi chu lawi upa in a pang ngai puau a, nasem zosia hile lawi upa tâk ahi diak kît puau ah, himaleh lawi upa ding chu nasep thanuam mi ahi deu tei tei sek ui.
54. Ngaidân gênkhawmna hun ah thipbek ah umte haw hi, a vainung leh ngaidân haute ahi nuam sek ua, gêndi sak leh thang hawl hawl ziangte haw hile a thugen dawsa dinpi tak tak theilo te bang ala hinuam kît sek ui.
55. Athu in kina lui lui leule amau ki muda denlo ah umthei te chu mipil ahiu ah, kinialna neucha a um phawt leh ki muda den ziang

kiti hi nammawl ihi nau suklatna ala hisek hi.

56. Eipau ah "mawpawtu" kiti hi tamtak in lawi upa ah pang, vaihawmtu leh thuneitu ah pang ti' lam bep in ila kawi khasek ua, "amaw zosia le pua ahii" ti hi ila ngaitua bêk ngailo uh ahi.
57. Election itiu hile a bullim leh nasatak ah kisawn kisawn ah, a tawp leh kisawn tha ziang tile umthei ahi ziakin, eilam ah pang ahi ti ah mawk lungmuan ziangthei le ala hisek lo dân ahi.
58. I khristian gam uh i mumallo dân dân uh ahung kilatna diak diak sekna chuh election hung um phât hileh nasatak in ahung ki tâklang diak sek ahi.
59. Vangam lût di dân achu ki kikawi sau sau chiat chu ahia, thildang dang chu thuchuam hi taleh, election hun ah i gamtat dânteu haw hi i et phat takleh, kua vangam malak,! gawtmun tungzo ham ham ding po hile a hung kihi tawl kha mai diam maw!..?
60. Insung mun neucha khat ahi lai ah ki etkawl tûp ki gawlo ah, khawtang leh i gamsung uh munlian tak sung ah ki etkawl tûp ihung guat taktak uchu akua kua le i l'a thei u ia maw..?

--o0o--

## Presbytery sung thu chuam chuam:- (Dec.)

1. **KSP Munpi nasepna:** Dt. 11/09/2021 ni'n Trustee Committee memberten KSP munpi nasepna ding gam tê in annekkhawmna le nei ahi. Dt. 20/09/2021 ni'n handsaw gawi in comtt. memberten thing phuk pat ahi. Thing phukzaw in a zung/a bul JCB lakdaw sak ahi. Thing kiphukte a hawi lai sia at in a chawm/a sau a leng in cubic 400 val at daw ahi. Thing kitan at theilote khenkhat fencing / daikhuam ah phu in Birbed wire/thikkhau lingnei kai kimvel ahin, gate siam in chabi bul ahi.
2. **Munpi Biakin Sak:** KSP Munpi ahin Biakin sak pat ding ah phasak ahi dungzui in foundation siam zo in, foundation suang Dt. 27<sup>th</sup> Oct. 2021 zingkal in Upa Tinkholam Moderator in a phum a, biakin sak pat ahi ta, a chug khu zaw ahi ta, tuhin a bang, a tuang leh a tukvan leh kawt a vat hi.

- 3. 64<sup>th</sup> KSP Annual Session:** Khuga Sadar Presbytery 64<sup>th</sup> Annual Session chu Date 9<sup>th</sup> – 12<sup>th</sup> December 2021 sung in T. Loklaiphai Presbyterian Church (KSP) ah a um a, lawting tak ah hun mat zaw ahi. Khawmpi vaihawmna palai mi tamtak chiakhawm in, vaihawmna kitup tak ah zaw ahi. Moderator thak Rev. Thanglianmang, Executive Secretary, Manipur Presbyterian Church in a kaihuai a, Tukum 2021 sung ah kochuam upa – 7 thite sunna leh a insung miteu ding ah pauchap piakna Upa Khupmang in a mang a, chuleh Elect upa 10 Rev. Thanglianmang, Moderator in a ordained hi.
- 4. Sum leh pai dinmun:** Tu kum chu corona virus ziak ah lockdown leh curfew ziak in kochuamte May – September 2021 tha -5 (nga) sung set kikhawm thei lo um maleu hen, kochuam tin leh bialtu Pastorte hapanna zal in sawmakhat, anchangham leh thawlawm office lam in a hung lut zing a, chuleh office le kai thei tiang chan ah kai in I pankhawm chiatnau zal in sum leh pai dinmun le tasam talua chuam diak lo in a pumpi in budget I khel thei ua, closing balance kilawm kham I nei thei ua, a kipak um ma mai. Chun lockdown curfew ziak in I sep ding dawl I sep zaw lo a um chuam diak pua, Pathian kiang in kipak thu gen hi tiu. Budget session thak: 2021-22 ah a sang ah phazaw diak ah sep ding chu I kinepnau ahi.
- 5. PMS Tispari leh Tonglon D:** I Presbyterian Mission School te, Tispari leh Tonglon D School lam le lockdown curfew um maleh phatak in a kai thei ua, Tonglon D School vang a chawl lo ahi pen mai ui. Chun Tispari School in le lockdown sung in hun chawmkhat chu online class in a bawl ua, September tha a pat Pradhan leh a memberte phalna zal in uniform bei in a kai ua, academic calendar phatak in a zui thei ua, Final exam le November thatawp in bawl bawl zo tau. Tispari school a hin tu kum student – 94, i nei ua, kumthak le chu 100 (zakhat) val nei thei ding ah kinep ahi.
- 6. Cachar Mission Field Chapel Hawna:** Cachar Mission Field

chapel kisa chu zaw ahi ta, Date 3<sup>rd</sup> October 2021 Pathian ni dak 1:00 PM in Upa Tinkholam, Moderator KSP in hawna a nei tai. Cachar Biakin furniture ding a nuai ah gual hin dawn ahi: i) Table – Lingsiphai M & E Board, ii) Chair – Pu E. L Soson, Central Church iii) Chair – Upa Ph. Kamlam L.Champhai, iv) Miss. Kimjoy Lecturn (Ginna thutiam a) v) Pulpit – Hq. Church Tuibuang, Chuleh KSP Office Session Hall Plastic Chair lui – 20 puak thak ahi.

7. **Nepal Mission Field:** Pathian in lem a ti chun kum thak – 2022 sung ngei ah Nepal ah Mission Field hawn ding ah M & E Committee chun pha a sa, Field hawn theina ding in O/B ten Katmandu ah Pastor Suman Thapa a va kimupiu a, thil um dan kanchian ding leh a mun va entha ding in sawl a hui.
8. **Sunday School:** Lockdown leh curfew ziak in Sunday school Piting leh NSSU class hawitak in kila theilo maleh tu Dt. 21<sup>st</sup> November 2021 ni khan exam bawl ahi ta, a result chu kochuam tin ah hung kihawmdawk ding ahi. Kum 2022 Piting Sunday School I thuzil uh Jakob, 1Peter leh 2Peter hi ding ahin, a hilchetna Rev. Thanglian-mang siam chu tuchung 64<sup>th</sup> KSP Annual Session ah kha la nailoten Office ah chawk ding in a um ahi. Bu khet ah ₹ 80/- (Eighty) man bep ahi. Chuleh NSSU Subject Beginner – Sacrament tiang a kim set in a kisuthak a, office ah chawk zing thei ahi.
9. **Khristiante Lathiangtho Bu:** Kochuam tin in La Bu I pawimaw ma ma tau a, La Bu revision Committee ten le theitawp ah panlak zing ahi. A pha thei pen ah siam ding kingaitua ahia, maleh a La bu section chuam chuam, etsaknan: Biakna la, Christmas la, Good Friday la, a bung bung ah hung kikawi khawm ding ahi ziak in a number hung kisang ding ahi. Tu hin proof reading bawl ding a vat nalai a, January / February – 2022 sung in mu thei hi ta ding ahi.
10. **Probationary Pastor lak ding thu:** KSP 64<sup>th</sup> Annual Session chun Pastor kidailo ziak in Pro. Pastor khat lak ding pha a sa, zia thu chu 1<sup>st</sup> Standing Committee in a hun bawzui ding ah a ngansia

dungzui in advertisement lekha kochuam tin ah hawmdaw ahin, Date 13<sup>th</sup> January 2022 leh written leh interview bawl ah lak ding in phasak ahi.

**11. Rev. Haulalven Pension Ding:** Rev. Haulalven chu Pathian Lal-gam a nasepna mualsua in Dt. 1<sup>st</sup> January 2022 leh pension ding ahi tak ziak in Date 7<sup>th</sup> January 2022 leh 12:00 ah Standing Committee ten KSP min ah thakna Prog. nei ding ahi. A bial puakna Town District hung awng ding chu Rev. S.T.Kaia Vaiphei in E/S, hina tawh April -2022 tiang a puakkhawm ding ah phasak ahi. Chuleh Rev. D.Robert Thanga in M.Th a hung chai tak leh May 2022 a pat a puak ding ah lemsak ahi.

**12. Financial Rules:** Khuga Sadar Presbytery Financial Rules mumal tak nei ding ah phasak ahi dungzui in Finance Committee chun a hun guanggal ding in mi a ngansia a, zia proposal kisiam chu Finance Committee leh Standing Committee in vel tamtak proof a bawl nung in 64<sup>th</sup> Annual Session ah pawlut in, session chun a lem-lona khenkhat Finance Committee in a hun siamphat ah Standing Committee in a la pawm ding ti ahi dungzui in Date 16<sup>th</sup> January 2022 1<sup>st</sup> Standing Committee chun pawm in mat pat hi ta ding ahi.

--o0o--

## ‘DAMNA AW’ PHUNGVUKTUTE :

### PATRON MEMBERS :

- |                       |                               |
|-----------------------|-------------------------------|
| 1. Pu P. Vaiphei IAS, | Imphal                        |
| 2. Upa Henthianthang, | S.Kotlian                     |
| 3. T.Upa Haulallawm   | S.Kotlian                     |
| 4. Upa Thienkhomang   | S. Kotlian                    |
| 5. Upa Laltinkhup,    | HQ. Church, Tuibuang          |
| 6. Pi Manliankim,     | HQ. Church, Tuibuang          |
| 7. Upa D. Mina,       | Lingsiphai                    |
| 8. T.Upa Ph. Gena,    | Lingsiphai                    |
| 9. Pu. Khamlal        | Saipum                        |
| 10. Pu Khamliankap    | Saipum                        |
| 11. Pu. Tinlunlal     | Saipum                        |
| 12, Pu. S.Kapbawi     | New Delhi                     |
| 13. Upa Genhau        | Central Church, Compound veng |
| 14. Pu. Khailianbawi  | Central Church, Compound veng |
| 15. Pi Kimtawi        | Kohima                        |
| 16. Tv. Daniel        | Tangmual                      |

### MEMORIAL GIFT :

- |                                |  |
|--------------------------------|--|
| 1. Pi Deem Melody,             | <b>Central Church, (Rengkai)</b><br><i>[In loving memory of (L) Upa Lamthianlal]</i> |
| 2. Pi Rebekah                  | <b>Kangvai</b><br><i>[In loving memory of (L) Pastor Khaivung]</i>                   |
| 3. Upa Liansawmthang           | <b>Lingsiphai</b><br><i>[In loving memory of (L) Pu. Henzagen]</i>                   |
| 4. Pi. Nem Grace Boisi Capvung | <b>Delhi</b><br><i>[In loving memory of (L) Pi Vanlalchhuangi]</i>                   |

### SUPPORTING MEMBERS :

- |                           |                 |
|---------------------------|-----------------|
| 1. Upa Khomlunlal         | S.Kotlian,      |
| 2. Pu. S.Thangminlian     | Lingsiphai,     |
| 3. Pu Lelboi,             | Lingsiphai      |
| 4. T.Upa Lalneilian       | Central Church, |
| 5. Pu EL Soson            | Central Church  |
| 6. T.Upa Genminthang,     | Central Church, |
| 7. Pi. Kimneihawi         | Saipum          |
| 8. T.Upa J. Mark          | Saipum          |
| 9. Pu Genthiankap,        | Nghathal        |
| 10. Pu Lianzakhup         | Nghathal.       |
| 11. Pu Lemthang           | L. Mission Veng |
| 12. Rev. S.T.Kaia Vaiphei | Nghathal        |
| 13. Nk. Dimkhoniang       | Zikpi Tampak    |

**ENCOURAGING MEMBERS :**

- |                   |                 |
|-------------------|-----------------|
| 1. Pu K. Minlian  | Tangmual,       |
| 2. Upa Ph. Kamlam | L. Champhai,    |
| 3. Upa S.T.Siam,  | L. Mission Veng |
| 4. Pi Chhungi     | Hq. Tuibuang    |
| 5. Pu S. Paumuan  | Saipum          |

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazal i hiu a, kuale phungvukna bawl utte a ding in bangtik lai in le bawlthei zing ahi.

**(i). Patron member- Kum 3 (three) a ding in. ₹. 3,000/-**

**(ii). Memorial Gift- Kum 2(two) a ding in. ₹. 2,500/-**

**(iii). Supporting member- Kum2(two) a ding in ₹. 2,000/-**

**(iv). Encourager- Kum 1(one) a ding in. ₹. 1,000/-**

Chun, sum thawt nuamte a ding in:

**A/C name: Khuga Sadar Presbytery(MPCS)**

**A/C nos: 32483318505**

**Branch code: 6182, CCpur**

**CIF nos: 86412486695**

**IFSC nos: SBIN0006182.**